

TRAICTE DE LA PESTE.

1.

Avec les remedes certains & approuvez
pour s'en preserver & garantir.

Nouvellement fait par le College de
Chirurgiens iurez de Paris

Seconde edition, reueüe & augmentee

De




Bourges.

A PARIS,

Chez NICOLAS BVON, au mont S.
Hilaire, à l'enseigne S. Claude.

M. DCVI.
AVEC PERMISSION.

C



PA R ordonnance de Monsieur le Pre-
uoost de Paris ou son Lieutenant Ciuil,
du 30. Iuillet 1606. Il est permis à Ni-
colas Buon, marchand Libraire à Paris, d'impri-
mer le *Traicté de la Peste, faict par le college des Chi-
rurgiens de Paris*, pendant & durant quatre an-
consecutifs: Auec deffences à toutes personnes
de les imprimer, vendre ny debiter sans le con-
sentement dudit Buon, à peine de confiscation
& d'amende, comme plus à plein est contenu
en l'original de ladite ordonnance.

Signé,

M Y R O N.

A MONSIEVR MYRON

Seigneur du Tremblay, Delignieres
& Gil-voisin, Conseiller du Roy en
ses Conseils d'Etat & Priué, Lieute-
nant Ciuil de la Preuosté & Vicomté
de Paris, & Preuost des Marchands.

COMME le maistre d'un nauire
se trouuant surpris de tempeste,
preuoyant le futur naufrage, a re-
cours (apres Dieu) au Pilote qui
conduit ledit nauire, pour trouuer moyen de
se garantir & sauuer: Ainsi, Monsieur, pre-
uoyant que ceste grand' nef de Paris estoit agi-
tee d'un vent pestilent & contagieux, auez eu
recours au College des Maistres Chirurgiens
iurez de Paris, les faisant assembler, afin d'a-
uiser, escrire & faire imprimer quelque petit
abbregé, pour par ce moyen preseruer & ga-
rantir ceux qui seroient frappez de telle mala-
die. Ledit College obeyssant à vostre Ordon-
nance, & loüable aduis, a redigé cet Enchiri-
dion pour vous faire voir à vn clein d'œil le
moyen de s'en preseruer & garantir, non pour
en faire ostentation: lequel si pour la briefueté
du temps ne se trouue si poly qu'il deuroit, pour

estre présenté à vos yeux clair-voyans, & au public. Le corps dudit College vous supplie tres-humblement, ensemble ceux és mains desquels il pourra tomber, de l'excuser, regardant plustost à la bonne volonté qu'il a eu de satisfaire à vostre Ordonnance, & de profiter tost au public, que de le retenir & garder plus long temps. Vous assurant toutefois, que pour contregarder & garantir ceux qui seront frappez de la contagion, il s'y trouuera de vrais & asseurez antidotes, bien experimentez en diuers lieux, ensemble le regime de viure que l'on y doit tenir & observer. Sera donc vostre plaisir de le recevoir d'aussi bonne part & volonté que le College vous le presente, demeurant tous

Vos tres-humbles & tres-obeyssants
seruiteurs, les maistres Chirurgiens
iurez à Paris.



ADVIS
ET BREF DISCOURS
POVR SE PRESERVER
garantir de la peste

Que c'est que peste, ses especes & differences

CHAP. I.



DE V A N T que d'escrire les
moyens de se preserver & ga-
rantir de la peste, il est expé-
dient de sçauoir que c'est, ses
causes, differences, & le moyen de la
cognoistre, à fin qu'en estant surpris, on
puisse soy mesme du commencement
se garder & secourir, considéré que le
malheur est tel, que le mary abandonne
la femme, & la femme son mary, le pere
l'enfant, & l'enfant le pere, & l'amy son
amy : bref que lon est delaisié le plus
souuét d'un chacun pour la crainte que
lon a d'estre touché de ceste cruelle &
furieuse maladie, qui tuë soudainement

*Ce que
apporte
la peste.*

la personne, d'autant que par sa qualité veneneuse qui surpasse toute malignité & pourriture, soudain elle infecte l'esprit animal contenu au cerueau, le naturel, qui a son siege au foye, & le vital qui reside au cœur, & tost apres suffoque la chaleur naturelle, dont la mort subitement & inopinément s'ensuit.

Les anciens & modernes ont diuirement definy la peste: Quelques vns l'ont appellee verges de Dieu, enuoyees sur la terre pour l'iniquité des pecheurs.

*Diuerſes
deſinitions
de peste.*

Galien la definit ainsi: Peste c'est vne maladie Epidemique; c'est à dire populaire & contagieuse, qui tue & fait mourir plus de personnes, qu'il n'en reschappe.

Ioubert dit que peste, est vne vapeur contagieuse conceuë en l'air, contraire du tout à l'esprit vital: ou vn venin contagieux causé en l'air, par admixtion de vapeurs putrides, & par constellation des astres malins.

Telle maladie est accompagnée de bubons, ou bosse, charbons, & exanthemes.

*Differē-
ces de
peste.*

Icelle est simple, ou composée.

La simple est quand les esprits sont

seulement infectez, par la qualité maligne & veneneuse, sans que les humeurs soient encore corrompus.

La composée est quand la malice & contagion est empreinte, non seulement és esprits, mais aussi aux humeurs.

Des causes de la peste.

CHAP. 2.

TOUS ceux qui ont parlé & écrit de la peste, ont mis deux causes d'icelle: l'une diuine, l'autre humaine. Quant à la diuine, elle est enuoyée de Dieu par son seul commandement, sans qu'il s'apparoissent icy bas aucunes causes, que nous disons secondes ou inferieures, qui l'engendrēt. L'Ecriture sainte nous le tesmoigne assez par l'exemple de Dauid, quand par son peché Dieu enuoya la peste, qui fit mourir septante mil hommes pour les superstitions & idolatries qui regnoient entre les hommes, Dieu dit qu'il n'en auroit point de pitié, & qu'il en feroit mourir la troisieme partie de peste. L'histoire Ecclesiastique rapporte, que durant la grand' peste qui fut à Rome on voyoit visiblement l'Ange du Seigneur, qui conduisoit le mauvais Ange, luy commandant de heurter

*La peste
est le
fleau de
Dieu.*

à la porte de ceux qu'il vouloit estre frappez de ce mal.

En fin, c'est vn iuste iugemēt de Dieu, enuoyé du ciel, non pour nous perdre, mais pour nous chastier de nos pechez, à fin de nous semondre, d'auoir nostre recours à luy.

*Causēs
humai-
nes de
peste.*

Les causes humaines sont celles que nous disons naturelles, lesquelles se rapportent à deux: l'une qui gist en nous, qui est l'alteration des quatre humeurs, lesquelles sont alterees, vitiees, & par cōsequent susceptibles à prendre la peste: ce qui prouient par nostre maniere de viure desreglee, vsant de mauuaises viandes, corrompuës & gastees, de la diuersité & quantité d'icelles, des longues veilles, violens exercices, cholere, tristesse & chagrin.

La seconde cause est hors de nous, qui est l'air, sans lequel ne pouuons viure, & comme il est corrompu nous infecte: d'autant que le respirōs & attirons au cœur.

*Causēs
de la cor-
ruption
de l'air.*

Or l'air se corrompt par diuers moyens, comme lors que les saisons de l'annee n'obseruent leurs constitutions naturelles, comme si l'Hyuer qui doit estre froid est chaud: & l'Esté qui doit estre

chaud, est froid: puis faire tãtoft chaud, tantost froid, tantost sec, tantost humide, avec quantité de pluyes & vents qui soufflent du Midy. Car l'experience nous mōstre que si en Hyuer, au lieu du vent froid & sec qui doit souffler, l'Austral donne avec bouffee estouffante, par son humidité, en laquelle il y a de la chaleur, qu'il s'ensuit de grandes pourritures. Ce que nous auons veu ce Printemps & au commencement de cet Esté.

Les exhalations putrides de la terre infectent aussi l'air, lesquelles s'ēleuent des eaux dormantes; pourries, croupissantes: comme des cloaques, ruisseaux, trous puants, & des charongnes que lon iette à la voirie, lesquelles choses engendrent grande puanteur, ennemie mortelle de la chaleur naturelle, & de nos esprits.

Des signes de peste.

CHAP. 3.

COMME nous auons dit qu'il y a vne fieure simple & l'autre composée, il y a aussi des signes & marques de toutes les deux.

*Signes de
peste sim-
ple.*

Les signes de la simple où les humeurs ne sont point corrompus, trompēt souvent les Medecins & Chirurgiens : car leur pouls n'est point fort frequent, ains petit, lasche & languide, sans que le malade se plaigne beaucoup de chaleur, ny d'alteration : leur vrine n'est beaucoup changee, semblable comme s'ils estoient bien sains : neantmoins ils se sentent fort abbatus, lasches, & quelquesfois meurent soudainement, d'autant que le venin faist incontinent les parties nobles, suffoque la chaleur naturelle : Et pour ce faudra y prendre garde, & les secourir promptement.

*Signes de
peste cõ-
posce.*

Les signes de la composee, sont changement de tout le visage du malade, ne se recognoissant bonnement, le corps mol au toucher comme celui de ceux qui se sont baignez : chaleur grande, & principalement au dedans du corps, battemēt d'arteres fort violent, le pouls tantost fort, tantost petit, grand' douleur de teste, vomissement, appetit perdu, la langue seiche, grande alteration, delire, assoupissement, la face rouge & les yeux estincelans, defaillance de cœur, charbons qui viennent en quel-

que partie du corps, bubons au col, aisselles ou aines: quelquesfois les malades ont difficulté de respirer, l'urine trouble & rougeastre, leurs selles sont liquides & comme fonduës, & les font souuent sans le sentir.

Des remedes preseruatifs de la peste.

CHAP.

4.

PRemieremēt il est vtile & necessaire d'escrire les remedes preseruatifs contre la contagion, afin de s'en garētir le plus que faire se pourra, puis ordōner ceux qui pourront, entant que l'art se peut estendre, garantir ceux qui en seront frappez ou atteints.

Or comme il y a deux causes de peste, il faut aussi que les remedes preseruatifs soient de deux sortes: les vns seront diuins, les autres humains.

Les diuins seront, auoir recours à Dieu, nous humilians soubz sa main puissante, & faire en sorte que nous inuouquions sa sainte Majesté, pour nous deliurer d'un tel mal par sa misericorde, luy demandant pardon de toutes nos fautes, sans y retourner & recidiuer. Par tel moyen nous preseruera, & chassera

*Deux
sortes de
remedes
contre la
peste.*

*Histoire
notable.*

loing de nous toute maledictiõ & peste, comme il fit à Rome: ainsi qu'il est écrit en la vie S. Gregoire, lequel fit prieres & processions generalles, & plusieurs sermons, à l'vn desquels moururēt quatre vingts quatre personnes, qui fut cause que ledit S. Gregoire se mit avec tout le peuple en si deuotes prieres que Dieu les exauça. Ce qui fut manifesté en l'air, lequel soudain se rendit clair & net de toutes immondices, & tost la peste cessa.

Pour les remedes preseruatifs qui sont humains, il faut auoir esgard à tout le corps de la ville pour le contregarder & preseruer, & pour ce faire les Magistrats y tiendront la main, & vn chacun en son particulier, donnant ordre que l'air qui est infecté soit rectifié & purifié: ce qui se peut faire par plusieurs moyens.

Premieremēt la ville sera tenuë nette de toutes immondices, vuidāt les bouës sans les laisser crouppir dedans les ruisseaux.

*Moyens
de tenir
la ville
nette.*

Sera commandé à vn chacun de mettre les ordures des logis contre les parois de leur maison, sans les mettre

au milieu de la rue , qui est cause que l'eau ne se peut escouler, en croupissant avec lesdites ordures:elles seront ostées de grand matin , ou tard, si faire se peut sans rien remuer de iour....

Tous les matins & au soir vn chacun , ayant puits en son logis, fera ietter deux ou trois seaux d'eau dedans le ruisseau.

Les trous & ornieres qui sont au pavé, seront refaits & repauez.

Deux ou trois fois la semaine en chaque rue lon fera des feux au soir, & mesme aux grandes places de la ville , afin de purifier l'air.

L'urine des logis sera jettée au priué ou ruisseau, avec quantité d'eau claire , & non par les fenestres, comme il se fait ordinairement.

Ceux qui ont des estables, tous les iours à l'endroit que coule l'urine des chevaux , feront ietter quantité d'eau pour le lauer.

Pour le regard des bouchers, le sang & tripailles des animaux qu'ils tueront, serót iettez par leurs seruiteurs en l'eau: nettoyez & lauez à la riuere, & non en leurs logis.

On fera que les cloacques & esgouts s'escouleront facilement.

Sera defendu de vendre aucun fruiët qui ne soit bien meur.

Les inuentaires seront defenduës, & sera faiët commandemët de ne deloger à ce prochain terme de la S. Remy, pour ne rien esmouuoir au logis d'un chacun.

Il faut que les Medecins, Chirurgiës, Apotiquaires, Gardes, Porteurs, & autres ministres qui assistët les malades, portent quelque signal ou marque, afin de se retirer d'eux.

Les corps morts de peste ne seront enterrez que la nuïët, afin d'oster l'apprehension au peuple, & pour euitier les exhalations malignes qui s'esleuent à l'ouverture de la terre : pour mesme raison seront profondement enterrez.

Les grandes assemblees sont dangereuses, & principalement où le menu peuple aborde.

*Le deuoir
du parti-
culier.*

Or en ce qui concerne le particulier, il faut que chacun tiëne sa maison nette le plus que faire se pourra, & que sa personne, femme, enfans & famille se tiennent nettement : Car nous voyons ordinairement que les maisons des pauures qui sont sales & ordes, sont plustost en-

tachees de ce mal, que celles des riches qui se tiennent plus proprement.

Pour le regard de la maison, afin de la purifier du mauuais air, le feu est fort recommandé, jettér souuent de l'eau és cours, cuisines, & estables. Ceux qui auront moyen ferót arrouser leurs sales, chãbres & cabinets de vin & vinaigre, les ferót parfumer avec benjoin, storax & autres aromatiques, faisant jonchee de bonnes herbes odorantes, & les pauvres feront le semblable avec bois de geneure. On pourra garder les plures de citron, oranges, & les mettre en vne escuelle ou cassolette, cloud de girofle avec eau rose, pour en faire parfum : sur tout la maison fera souuent houeée & nettoyée.

*Moyens
de tenir
la maison
nette.*

Les fenestres & portes des maisons seront fermées deuant que le serain vienne & entre, & ne seront ouuertes qu'après le Soleil leuant, qui aura dissipé les malignes vapeurs de la nuit.

Les chiens & chats domestiques ne sortiront hors de la maison, & ceux des voisins n'entreront aux autres.

*Ce que chacun doit obseruer pour se preseruer
de la peste. CHAP. 5.*

TOuchât ce qui regarde les personnes, sera bon changer souuent de linge & habits, à ceux qui en auront la commodité.

Les plus propres habits serôt d'estoffe lissée & polie, comme satin, taffetas, camelot, trilly, & bougran.

*Preceptes
pour vn
chacun.*

Sera fort bon le matin se lauer les mains, bouche, dents, oreilles, nez, yeux & face avec eau & vin ou vinaigre rosat. Les eaux de senteurs serôt propres pour les riches, y adioustant vn peu de vin ou vinaigrè rosat.

La chaleur vehemente du Soleil, & sur tout les rayons de la Lune, comme le serain sont à fuir & euitier.

*Il faut se
purger et
saigner.*

Le corps de la maison estant ainsi nettoyé & purifié du mauuais air, il faudra purger & nettoyer le dedans de la personne des ordures, immondices & mauuaises humeurs qui se feroiēt accumulez en nous de longue-main, & garder qui ne s'engendre d'autres, ce qui se fera tenant bon regime de viure, & se purgeant & saignant quelquesfois.

Ceux qui sont desreglez en leur viure,
& ne

& ne gardent aucun regime, & qui sont remplis de mauuaises humeurs, sont facilement surpris de la peste.

Le regime sera tel, faudra s'abstenir de toutes viādēs qui se corrōpēt facilement, *Le régime de viande* d'autant qu'elles engendrēt pourriture au corps, & font des obstructiōs: Euitier toutes viandes cruēs, & mal-cuites & de difficile digestion, toutes sortes de patisseries, laiētages, fourmages, legumes, pois, febues. On vsera de veau, mouton, & autres viandes escrites au regime des malades. Les poissons pour ce qu'ils sōt phlegmatiques & se corrompent facilement, seront interdits, si ce n'est en petite quantité.

Toutes sortes de fruiçts doiuent estre defendus, si ne sont les cerises, prunes de damas, & pommes de capendu.

De toutes sortes de viandes on en māgera que d'vne à chaque repas, si faire se peut: car la diuersité se corrompt facilement.

Pour le boire, le meilleur est le vin, & *Le boire.* le tremper mediocrement: mesme accoustumer ceux qui n'en boient point de boire del'eau vinee.

Le trop dormir & tost apres le repas *Le dormir.*

doit estre euité : le trop veiller eſt auſſi contraire pource qu'il engendre cruditez & abondance d'humeurs.

Sera bon auoir benefice de ventre, prenant quelques clyſterès ou vn peu de ſené, avec vn boüillō, ou pour mieux des pillules de Ruſſus.

Perturbations d'eſprit. Toutes perturbations d'eſprit ſont à euitter: cōme la cholere, crainte & apprehenſion, courroux, triſteſſe & chagrin.

Exercice. Sera bon faire exercice moderé, & principalement deuant diſner & ſouper: mais de s'eſchauffer par trop, il eſt fort cōtraire, comme auſſi trop s'adonner aux femmes.

Faut ſe purger Et ſaigner. Cependant que l'on vſera d'vn tel regime de viure, & conſiderāt qu'ils s'engendre tous les iours quelques excrēmens & humeurs en nous, on ſe fera purger & ſaigner.

La purgatiō ſera avec ſenné, rheubarbe, aggaric, aloës, & autres tels remedes qui ſont doux & benigns, & nō violens d'autāt que d'agiter beaucoup le corps en tel temps, il eſt fort dangereux. Si la chaleur eſt grande, on prēdra quelque breuuage, potion, ou bol de caſſe, y ad-

ioustant vn peu de rheubarbe: prenant l'aduis du Medecin, s'il y en a.

Ceux qui ne peuent se purger par potion, pourront prendre des pillules ou tablettes, & principalement si le temps est moderé ou froid.

Ayant esté ainsi purgé, il faut s'asseurer tant qu'il sera possible, sans craindre le danger, auoir l'esprit tranquille, non vacillant & estonné: car la crainte & frayeur peut dōner entree à la fièvre pestilente en s'imaginant le danger de ce mal.

L'assurance est.

Aussi deuant que sortir faut prendre quelque antidote, que descriptōs, ou biē prendre vn peu de pain & de beure frais salé, & boire deux ou trois doits de vin: car le corps estant plein, plus facilement se defend des vapeurs malignes & veneneuses. Sera expedient d'attēdre que le soleil soit leué; & ait dissipé les vapeurs malignes de la nuit.

Plus pleine que vuide.

Sera bō se faire appliquer des cauterres derriere le col, au bras, jambes, selon vostre commodité. Tel remede est fort recōmandé: ce que l'experience a mon-

Les fontanelles sont pres

que de soixante à quatre-vingts mil qui moururent, on a remarqué que de tous ceux qui assistoient aux malades, ayans cauterés, il ne mourut que 2. Prestres.

Si l'on est contrainct de s'approcher & parler à quelqu'un qui soit pour suspect, il se faut mettre du costé du vent, & qu'il vous donne contre le dos.

Belle observatiō. Estant surpris, allant visiter quelque malade, il se faut bien garder de se mettre entre le malade & le feu s'il y en a: car le feu attire la contagion du malade à celuy qui est sain, estant entre luy & le feu, & sera bon par mesme moyen de changer d'habits, prendre l'air, & quelque antidote, & se resoudre en soy-mesme.

Des remedes preseruatifs.

Chap. 6.

Preservatifs. **L**Es remedes preseruatifs sont de deux sortes: car les vns sont pris par dedans, & sont dits interieurs. Les autres sont receus en dehors, & sont extérieurs.

Pour les extérieurs, nous comprenons toutes sortes de senteurs, & pour ce vn chacun mettra dedans son linge & habits, pouldre de senteurs: les pau-

ures y mettront des fines herbes, cōme romarin, thim, lauande, marjolaine, fouchet, racines de flamme : les riches auront poudre d'Iris, violettes d'Ipre, & roses musquées & parfumees, le cloud de giroffle a vne bonne odeur & de longue duree.

Quelques vns sōt de contraire opiniō & tiennent pour singulier remede, de sentir tous les matins l'odeur des retraits & priuez, & s'aydent de l'opinion d'Auerroës, lequel donne pour singulier remede contre la peste, de fleurir souuent l'vrine d'un bouc, ce que ne pouuons conseiller.

On pourra se frotter le visage d'un peu de vin & vinaigre rosat, ou bien d'un peu d'eau de vie & eau rose, dedans lesquelles on aura fait tremper clouds de giroffle, cannelle, benjoin, storax, *calamus aromaticus*, marjolaine, romarin, fleurs de lauande, & de ceste liqueur on en prendra vn peu dedans la main, pour en frotter son visage.

C'est vn bon remede de prendre vne goutte ou deux de baulme du Perou, & s'ē frotter vn peu la paulme de la main, puis le visage, en prendre vn peu avec

La li-
queur
de ben-
join

cotton, & en mettre à ses oreilles.

On pourra porter au col quelque pōme de senteur ou quelque petit sachet fait de choses odorantes, en le tenant mesme à la main allant par la ville: ou bien prendre vn citron lardé de clouds de giroffle.

Tels remedes seront accōmodez selon le naturel des personnes: car il y en a qui ne peuuent supporter les fortes senteurs, comme les catarreux, les femmes qui ont suffocation de matrice, & pour ce porterōt de la rhuëlaquellerefi-
La rhuë est fort recom- mandee. ste fort au mauuais air & à la contagion.

Plusieurs ont opinion que les pierres precieuses portees en bagues & anneaux preseruent de la peste, autres enfermēt du vif argent dedās la coquille d'vne aueline ou amande, & le portent avec vn cordon pendu au col, autres prennent de l'orpiment, arsenic & realgal, & en font petits sachets, portez sur la region du cœur, ce que ne pouuons approuuer. Ceux qui les ordonnent, disent que le cœur s'appriuoise, & & familiarise peu à peu au venin, tellement qu'il en est moins offensé, en estāt par apres attaqué.

Quant aux remedes interieurs qui se prennent par la bouche, ils sont de plusieurs sortes, comme eaux, breuages, opiates & conserues: tablettes ou trochisques, poudres & pillules, desquelles chacun pourra vser selon sa commodité & volonté.

Eau singuliere.

℞ radicū Zedoariæ, Tormentillæ, Enulæ Eau.
Camp. & Angelicæ añ. ʒ. ij. Cinamomi ʒ. ʒ.
santal. vtriusq; cortic. citri añ. ʒ. j. ʒ. scabiosæ
pimpinellæ, oxalidis rotundæ, scordij & regi-
næ prati añ. m. ij. seminis citri & cardui be-
ned. coriandri. añ. ʒ. ij. ʒ. macer. In aquis par-
tibus vini albi & aquæ font. calentis añ. ʒ. ʒ.
ij. spatio xx. hor. deinde distillent. in balneo
marie. De ceste eau en fera pris tous les
matins à ieun vne petite cuilleree.

On peut vser de l'eau Theriacale, qui se
dispense au logis de tous les Appoti-
quaires.

Breuage.

℞ aquar. cordial. & reginæ prati añ ʒ. i. In Breuage.
quibus dissol. theriac. veteris g. ij. confect. 8^e.
alkermes g. ij. boli arm. g. vj. Syrup. de limo-
nib. ʒ. i. fiat potus.

Opiate & Conserue.

℞ conseruæ rosarum ʒ. i. conser. buglossi,

boraginis añ 3vj. conseruæ anthos 3ij. theriacæ veteris 3ß. mitrid. 3i. confectionis alkermes 3ij. pul. electua. dramarg. frigidi, & letificant. Galeni añ g. x. cum syrupo confect. citri. fiat Opiata. De ceste opiate on en prendra la grosseur d'une noisette tous les matins.

Tablettes & Trociques.

Trocis-
ques.

℞ radicis torment. & Zedoaria añ. 3i. radicis Angelicæ & Dictami añ 3ß. boli armeni veri, & terra sigillata añ 3ß. confect. alkermes 3ij. confect. de hiacintho 3i. pul. elect. aromat. ros. g. vj. sacchari cum aqua cardui benedicti dissoluti 3vj. fiat elect. per tabellas pond. 3ß. vel 3ij. vel dissolue saccharum cum mucagine gommi tragaganthi, & fiant trocisci.

De ces Tablettes on en prendra vne tous les matins, voire deux par intervalle: vray est que les Trociques sont plus propres & se tiennent d'auantage à la bouche, les laissant fondre.

Poudre, de feu Monsieur Hollier.

Poudre.

℞ Dictami Cretensis, tormentille, betonica, gentiane, morsus Diaboli, croci añ 3i. sacchar. ad pondus omnium fiat puluis cuius Dosis est ad 3ß. cum syrupo conseruationis citri, vino, aquis cardiacis, vel iure carniū,

*Conserue de Citron, fort singuliere & facile
à faire.*

Prenez vn citron le plus charnu que pourrez, lequel coupperez tout entier par morceaux, puis sera battu & pillé dedans vn mortier de marbre, tant qu'il reuienne en paste, y adioustant le mesme poids de conserue de roses liquides, que meslerez & pillerez ensemble, & garderez pour en prendre les matins la grosseur d'une aueline. Le citron par son escorce repousse la contagion de l'air infect & veneneux, & par son jus tempere la grand' ardeur des humeurs, & la conserue de rose fortifie l'estomac.

*Pillules, pour en prendre deux ou trois la
semaine.*

Entre toutes les pillules celles de Ruffus emportēt le prix, qui sont telles.

Pillules de Ruffus.

*℞ Aloës lot. & prepar. ammo. añ ʒ ss. Pillules.
Myrrhe ʒ ij. croci ʒ i. cum vino generoso, for-
mietur massa, vel cum syrupo de limonibus.
De ces pillules on en prendra vne demy
dragme ou vne scrupule, deuant disner.*

Opiate pour les pauvres

Pour les pauvres on dispensera ceste *Opiate.*
Opiate, mesme ils la pourront faire en
leur logis.

Prenez vne douzaine de vieilles noix non raucides, vne douzaine de figues, le poids d'un escu de rhuë, & le poids de demy escu de sel, le tout sera broyé ensemble avec vn peu de vinaigre, & gardé pour en prendre la grosseur d'une aueline ou noisette, tous les matins deuant que sortir.

Autre.

Prenez Theriaque & Mitridat de chacun le poids de demy escu, bol fin le poids d'un escu, conserue de rose, buglosse & bourroche, de chacū vne once, conserue de fleurs de romarin demie once, le tout sera meslé ensemble pour en prendre tous les matins la grosseur d'une febue.

L'Opiate de Ouo est tres-excellente, dont la description est telle.

Opiate de Ouo. Prenez vn œuf de poule bien frais, que percerez par le bout, pour en oster le blanc, y laissant le iaulne, & au lieu du blanc osté, vous y mettrez du safran, estāt bien bouché avec vn peu de paste sera mis au four, pour estre cuit & desseiché, afin de le reduire en pouldre: puis prédrez de la racine d'Angelique, morfus Diaboli, dictame, Zedoaria, pim-

pienelle, de chacū deux dragmes, Theriaque vieille trois onces, le tout sera mellé ensemble & incorporé, adioustāt de l'eau de scabiēse, tant qu'il sera besoin pour faire Opiate, de laquelle on prendra quatre, cinq ou six grains tous les matins, avec vn peu de vin pour se preseruer: mais si on se sentoit frappé on en prendra le poids d'vn escu, selon l'aage avec eau de la royne des prez, ou eaux cordiales.

Ce qu'il faut faire soudain que l'on se sent frappé & atteint de la peste. CHAP. 7.

A Pres auoir briueuement parlé de la preseruation de la peste, reste à parler de la guarison: puis qu'il nous a esté enchargé de ce faire, & que nostre deuoir nous y conuie.

La principale intention de guarir la peste, est de munir, defendre, corroborer & fortifier les parties nobles, qui sont le cœur, le foye & le cerueau, ayant esgard aux autres parties qui seruent à icelles, combattre & s'opposer contre la maligne, veneneuse, & occulte qualité, & l'empescher d'approcher d'icelles

Faut combattre le venin.

parties nobles, la chassant hors du corps par les contraires qui sont les antidotes, alexipharmques & contre-poisons.

*Côme le
venin se
fourre.*

Or comme ainsi soit que ceste maligne & veneneuse qualité est tres-subtile, facilement se fourre, & entre au dedans du corps, en respirant l'air par la bouche, nez, se glissant mesme par les pores de la peau insensiblement, qui fait que ceux qui sont de texture rare, ou de mauuaise habitude, chargez de malins humeurs en sont plustost surpris, batus & abatus que les autres.

*Methode
pour gua-
rir.*

Afin de guarir methodiquement ceste maladie, soudain que l'on aura soupçon d'en estre frappé, il faut auoir recours aux antidotes, & ce sans differer: car le tarder nuit beaucoup, donc sans delay on prendra tel remede qui s'ensuit, & si faire se peut, le malade se mettra deuant le feu pour s'y bien chauffer, ou bien se promenera, & tost apres se couchera dans le liét chaudement, afin de suer le plus qu'il pourra: car l'experience nous a monstré, que la sueur est grandement profitable en ce mal, & que le venin pestiferé sorte hors du corps avec icelle, par où il estoit entré, soudain qu'il aura

pris ledit antidote, en fera mesme diffoudre le poids d'un escu ou deux, ou bien de la theriaque ou mitridat, pour se faire frotter la region du cœur, foye, temples, nez, bouche, & la partie où il y aura quelque enflure, bosse ou charbon, laissant à l'endroit du cœur un petit linge trempé en ladite liqueur & dissolution.

Faut frotter la region du cœur.

On ne se contentera pas de donner une seule fois quelque antidote, mais fera reiteré par deux ou trois iours, & ce deux fois le iour, si tant est qu'il en soit besoin & necessaire, ayant esgard aux forces du malade qui pourroient estre diminuees & abbatuës par les sueurs, lesquelles seront restaurees avec un peu de pain trempé en vin. Et où durât la sueur seroit alteré prendra quelque iulep fait avec eaux cordialles, & sirop de limons, ou de grenade, ou bien tel breuvage.

Reiteration du remede.

Prenez trois ou quatre tranches de citron sans estre pelé, une demie once de sucre en poudre, une chopine d'eau bouillie ou non, battez le tout ensemble, le reuersât en deux verres l'un apres l'autre, puis le donnez à boire au malade: de ce breuvage il en pourra aussi user à ses repas.

Bolus cordial.

*Des remedes que l'on doit donner si tost que
l'on est frapé de la peste. Chap. 8.*

L Es remedes desquels on doit vser
& prendre se sentant atteint de la
peste, sont tels. Premièrement, l'Opiate
de Ouo est tres-excellente ; pour en
prendre la quantité du poids d'un escu,
dissoulte en vin, eau de chardon benist,
melisse, buglosse ou bourroche.

Poudre fort approuuee.

Poudre.

℞ boli arme. & terræ sigillat. añ ʒ j. cinamo.
ʒ iiij. radicis & folior. dictami, tormentille,
gentiane & bipinella añ ʒ i. ℞. seminis citri
& acetos. añ ʒ j. santal. omnium añ ʒ j. ℞. Ze-
doaria, scordij, rasura eboris, marg. saphiri.
osus cordis cerui, Angelica añ ʒ ij. unicornu
& lapis bezoardici añ ʒ i. fiat pul. subti-
liss. capiat. ʒ j. estate cum syrupo de limonibus,
vel cum aqua cardui benediecti, scabiosæ; vel
cum conserua rosarum: hieme cum vino vel
aqua Theriaces.

Opiate fort singuliere.

opiate.

℞ conseruæ rosar. buglos. borag. añ ʒ ℞.
theriace vet. ʒ i. ℞. boli armeni. ʒ i. pul. elect.
latificatus Galeni ʒ ij. terræ sigillata ʒ ℞. misce,
fiat opiate; dosis est ad magnitudinem nucis
muscate, capiat cum aqua regina prati, vel
cum aquis cardiacis, vel vino.

*Eau tres-approuuee qui a esté enuoyee au Roy
de la ville d'Oostende, lors que la peste y
estoit durant le siege.*

Prenez deux douzaines de noix vertes
concaffees, baies de geneure concaffees *Eau sin-*
demie liure, racine d'Angelique quatre *guliere.*
onces, fueilles & fleurs de la royne des
prez six poignees. Chardon benist qua-
tre poignees, fueilles de scordion & de
rhuë, de chacune deux poignees, deux
testes * de cerf fresches, coupees par ** Les tes-*
morceaux, ou en leur lieu prenez ra- *tes sont*
cleure de corne de cerf demie liure, fai- *cornes.*
tes le tout infuser dedans douze liures
d'eaux cordiales, & deux liures d'eau de
vie, puis distillez le tout ensēble au bain
marie. Prenez de ladite eau dix liures, y
adioustant theriaque vne liure, mitridat
demie liure, poudre de diamargariton
froid, poudre de lætitia Galeni, de cha-
cun deux onces, faites le tout tremper &
infuser huit iours, puis le distillerez en
bain marie: & en donnerez trois ou qua-
tre onces, selon les personnes, & l'aage,
lors que l'on est frappé.

*Essence faicte en maniere de syrop, tres-
excellente.*

Prenez racine d'Angelique, Zedoa-

*Essence
fort ap-
prouuee.*

ria, Gariophilata, Tormentille, de cha-
cun demie once, racine de chelidoine
deux dragmes, escorce de citron six
dragmes, semence de chardon benist,
d'ozeille & de citrô, graine d'alkermes,
& de geneure de chacun trois dragmes,
sandaux, canelle, de chacun ij. dragmes,
macis, giroffle, de chacun vne dragme
& demie, myrrhe, oliban mastic, saf-
fran, camphre de chacun vne dragme,
corail, perles preparees de chacū demie
once, fleurs de soucy, mille pertuis, cen-
taure, de royne des prez, de chacun vne
petite poignee, le tout concassé & meslé
ensemble sera mis dans vne bouteille
de verre à long col, dict matelas, assez
grand, versant dessus jus de citron vn
demy septier, vin blanc, trois poissons,
eau de la royne des prez, de scabieuse &
de chardon benist, de chacun demy sep-
tier: ledit matelas sera bien bouché &
mis au bain marie pour infuser, l'espa-
ce de six iours, puis la liqueur sera ver-
see doucement dedans vne autre bou-
teille ou matelas, y adioustât sucre can-
dy demy liure, remettant ledit matelas
derechef au bain marie l'espace de deux
iours, puis ladite liqueur sera versée par
incli-

inclination en vne bouteille de verre, & gardee pour en vser & prendre se sent ac frappé, la doze ou quantité que l'on en doit vser est demie once, avec quelque eau cordiale.

Et à l'instant que l'on vsera des susdits remedes, il faudra en mesme temps munir le cœur avec epithemes.

Epitheme pour le cœur.

℞. aqua buglossi, rosar. acetos. & absinthij añ. ʒij. santale rubri ʒj. B. boli armeni veri ʒss. croci ʒss. theriacæ ʒj. vini albi, fiat epithema. Epitheme pour le cœur.

On pourra apres auoir appliqué l'Epitheme, mettre à la région du cœur vn tel cataplasme.

℞. conserua rosar. buglossi, boraginis añ. ʒj. conserua anthos ʒss. theriacæ veteris ʒj. Pulueris Ireos ʒij. fiat cataplasma. Cataplasme cordial.

Et pource qu'il y a tousiours vne grande chaleur au foye, & hipocondres, on vsera d'vn tel epitheme.

Epitheme pour le foye.

℞. aqua lactucæ, scaripæ, acetos. & nenuph. añ. ʒj. aqua rosar. absinthij añ. ʒj. santalorū omnium añ. ʒij. coralli rubri ʒj. B. caphuræ ʒss. aceti ʒj. fiat epithema pro regione hepatis. Pour le foye.

Tels antidotes seront preparez de lō

gue main : car il seroit trop tard de les composer estât frappé de ce mal , mais si on estoit sans en auoir , on peut prendre assuremēt le poids d'vn escu de theriaque , & la faire dissoudre avec eau de la royne des prez , du chardon benist , ou vn peu de vin & eau bouillie , se mettant au liēt comme dessus.

Partant nous conseillons à vn chacun , d'auoir en son logis vne once de bonne Theriaque , afin de n'estre surpris sans remede , tenant ses armes prestes contre la violence de ce mal , lequel est si traistre qu'il saisit & assaut les plus forts & robustes fort promptement.

Galien dit que ceste Theriaque est comme vn feu purgatif , d'autant qu'elle destruit & consomme le venin de la peste. Mesme Galien assure estre vn remede prōpt & seur , de prendre la pesantueur d'vn escu de vray bol d'Armenie , avec trois onces de vin blāc , & vne d'eau scabieuse ou roses. Si les chaleurs sont grandes , Auicenne conseille au lieu de trois onces de vin de prendre trois onces d'eau , & vne once de vin.

On tient que la vraye terre si-

*Le bol
fin est
singulier*

gillee a pareille vertu. Chacun peut estre garny de telles drogues faciles à auoir & porter.

Si on est aux chāps degarny de tous remedes, on prendra de fucilles de rhuë scabieuse & chelidoine de chacun vne petite poignée, lesquelles on pillera dās vn mortier avec vn demy septier de vin blanc, pour en tirer le jus qui sera passé par vn linge, & pris comme les autres antidotes. Propriété
remède

Et où le malade, ayant pris quelque vn des susdits antidotes le reuomissoit, il faudroit derechef luy en donner vn autre semblable, ou plus agreable: encore qu'il ne soit mauuais au malade de vomir, d'autant que par telle euacuation il jette hors quelque venenosité. Belle
eruacion.

Du regime de viure des malades.

C H A P. 9.

LE regime de viure sera pris de six choses non naturelles, qui sont l'air, boire & manger, repos & mouuement, dormir & veiller, inanition & repletion, & les affections de l'ame.

*L'air
recom-
mandé.*

L'air est grandement à considérer en toutes maladies, mais principalement en ceste-cy, à raison que l'expiration & l'inspiration est nécessaire pour viure, & pource sera purifié & rectifié, comme nous auons dit cy-deuant, ayant la chambre bien aérée, si faire se peut, faisant souuent ouurir ses fenestres & portes, principalement si elles sont tournées vers la bise: aura du feu en sa chambre s'il ne faisoit trop chaud.

*Le man-
ger du
malade.*

Son manger sera de bonnes viandes de facile digestion, & qui engendrent vn bon suc, comme veau, mouton, poulets, chappons, pigeonneaux, cheureau, perdrix, cailles, lapreaux, & autres semblables: vsera plustost du bouilly que du rosty. En ses bouillons on fera cuire buglosse, bourroche, ozeille, laitue, cichoree, scabieuse, cerfueil, & du foucy: & telles viandes rosties ou bouillies, seront mangées avec jus d'oranges, citrons, grenades, verjus & jus d'ozeille. Pourra manger vn peu de cappres confites avec vinaigre rosat; vsera d'œufs frais pochez en l'eau, avec les susdits jus: à son entrée de table des pommes ou pruneaux bien cuits & succrez: se contentera à vn

repas de manger d'une seule viande, car la diuersité empesche de faire bonne & prompte digestion, & facilement se corrompt l'une pour l'autre.

Le viure par trop estroit est d'agereux.

Mangera modicrement craignant de vomir, à raison de la trop grãde quantité des viãdes qui chargeroit l'estomach: *Le trop manger nuit.* mais en recõpẽse mãgera souuent, pour restaurer les forces à cause des defailances du cœur qui sont frequentes, & à ce que les esprits soient augmẽtez pour acquerir de la vigueur, afin de resister au venin & le rembarrer viuement.

Son boire sera de ptisane, bouchet pour les premiers iours: ou bien du petit vin bien meur, trempé, & principalement à ceux qui sont vieux & accoustumez au vin, ou qui ont l'estomach foible & debile, qui sont trauaillez de vomissemens, flux de ventre, & qui ont les forces abbatuës. Et à vray dire l'eau vinee est vn singulier breuuage en ceste maladie, pourueu que la fièvre ne soit violente: si le flux du ventre ny le vomissement n'empeschent, l'vsage d'un petit vin blanc, vn peu verdelet est fort propre & agreable.

Entre les repas, pour la grande alteration qu'ils peuuent auoir, pourrôt vser de syrop de limons, berberis, aceteus de cerise, battu avec eaux cordiales, ou ptisane.

Observation pour le viure.

Or les deux ou trois premiers iours on se contentera de viure de bouillons de veau, mouton & volailles, alterez des herbes susdites, de gelee, pommes cuittes, raisins de Damas, pruneaux, œufs pochez en l'eau, panade, orge mondé, adioustant en ses bouillons du jus d'orange, citron, oseille & verjus.

A son issuë mangera vn peu de biscuit fait avec coriande: ou bien du verjus, cerises, espineuinettes, & groselles rouges, le tout confit.

La coriandre de estre commode.

Mouuement & repos.

Pour le repos & mouuement, il faut qu'il soit tranquille, sans se beaucoup agiter & trauailler, ny s'agiter deçà ny delà, ains se tiendra quoy, sans se beaucoup esmouuoir.

Dormir & veiller.

D'autant que les malades frapez de ce mal, sont souuēt assoupis, il est necessaire de ne les laisser par trop dormir, & principalement quand le bubon commence à s'apparoistre: neâtmoins d'au-

tant que tel mal est furieux, & qu'il n'y a point de maladie qui affoiblisse & prosterne plus les forces & facultez, ny en si peu de temps, que ceste-cy : il est necessaire de laisser dormir modérément le malade & principalement la nuit : car il n'y a rien qui remette plus les forces que le dormir, comme le veiller les dissipe.

Au commencement plusieurs n'approuuent ny la purgation, ny la saignée, mais plustost les remedes qui combattent par leur propriété spécifique contre la maligne qualité du mal, & qui sont sudorifiques, laquelle opinion nous tenons pour la meilleure : vray est, quelque temps apres que l'on aura mu le cœur des remedes alexitaires, on pourra venir à la purgation & saignée : purgeant, si le malade est cacochyme, & qu'il ait grande abondance & plénitude d'humeurs, esquelles la venenosité est contenuë, & en toute habitude du corps : saignant si la fiebre est grande & ardente, & que le malade ait les yeux rouges & estincelans, la face grandement enflammée, les veines pleines & tenduës, les arteres fort battantes, & principalement

*Saignee
& pur-
gation.*

*Quand
il faut
purger &
saigner.*

s'il crache du sang, s'il respire difficilement, & qu'il se sente comme brûler; ayant esgard toutesfois de ne saigner s'il est en sueur ou frisson.

*Electio
des par
ties.*

La saignée se fera en diuerses parties & veines du corps: si la peste ou charbon sont à l'émonctoire du cerueau, qui est le derriere des oreilles, la veine Cephalique du bras du mesme costé sera ouuerte: si aux aisselles qui sont les émonctoires du cœur, on ouurira la Basilique: si aux aines, qui sont émonctoires du foye, on tirera du sang du pied de la Saphene.

*Le vo-
misse-
ment.*

Et où nature voudra se descharger par le vomissement, on luy doit aider, d'autant que telle voye est propre & commode, pour se deuelopper & vider de tel malin & contagieux venin, yfant de tel vomitoire.

Vomitoire.

*Vomi-
toire.*

Prenez de l'huile d'oliue deux onces, eau tiede six onces, beuvez le tout soudainement, puis mettez vostre doigt en la bouche, ou le bout d'une plume pour faciliter ledit vomissement.

Autre.

Prenez raues deux onces, cinq ou six fueilles de cabaret, deux figes, faites

le tout bouillir ensemble, avec vne chopine d'eau. Prenez de la decoction huit onces, adioustez de l'oximel vne once, huile d'oliue deux onces, faites-le boire au malade comme dessus.

Comme il est necessaire que le malade ait le corps en repos, il faut aussi que son esprit soit tranquile, euitant courroux, crainte, tristesse, le nourrissant en esperance de bien tost & seuremēt guarir, ayant ferme assurence que Dieu luy renuoyera sa santé, sans le mettre en desespoir: & pource les Medecins, Chirurgiens, & autres qui luy assisteront, le resiouyront & assureront de sa santé, mesme ne luy fera dit aucune mauuaise nouuelle, mais sera entre tenu de propos qui le pourront recreer & resiouir.

Les perturbations de l'ame.

Comme il faut guarir l'Aposteme ou bosse pestifere. Chap. 10.

LEs anciens nous ont laissé par escrit, & l'experience le monstre, que toute tumeur & aposteme veneneux ne doit estre repoussé ne repercuté en dedans, mais sans delay, si tost qu'elle apparroist, l'attirer en dehors, ostant l'ennemy de la maison: & pource la porte luy fera ouuerte par plusieurs remedes. En

La peste ne doit estre repoussée.

Ventou-
ses pro-
pres.

premier lieu sera appliqué vne ventou-
se sur la partie, afin de faire douleur &
attraction le plus que faire se pourra : la
ventouse ayant esté repetee trois ou
quatre fois, & l'ayant ostee, sera mis vn
tel cataplasme.

Cata-
plasma.

℞ radicis liliorum & alibæ añ ʒij. radicis
cucumeris agrest. ʒj. foliorum senecionis, sca-
biosæ & oxalidis añ m̄ij. seminis lini, & fœ-
nugræci. añ. ʒß. caricarum pinguium nu. x.
coquantur in aqua communi, pistent. passen-
tur, passat. adde farine seminis lini, sterc. co-
lumbi. pul. tormentille & dictami añ ʒ.ij. fer-
menti acris. ʒj. mitridatij veteris ʒß olei lilio-
rũ & ungueti basili. añ ʒj. ʒ. fiat cataplasma.

Tel cataplasme sera mis ayant fait pre-
mierement vn petit liniment dessus &
autour de la tumeur, tel que cestui-cy.

Linimēt.

℞ olei de scorpionibus & liliorum añ ʒ.ij.
in quibus dissolue theriacæ veteris ʒ. j. fiat li-
nimentum.

Pour les
pauvres.

Pour les pauvres on prédra vn oignon
de lis, vn oignon commun, avec fueilles
d'oseille, que lon fera cuire sous les cen-
dres, puis on les pillera, y adioustant vn
peu de miel, vn jaune d'œuf & de la gres-
se de porc avec vn peu de leuain, & de
ce on fera cataplasme, on y peut adiou-
ter vne dragme de theriaque.

On pourra aussi estuuer la tumeur avec eau tiede, & huile meslez ensemble.

*Faut appliquer
le cantere.*

Si par tels remedes la tumeur ne viét à s'apostemer, & meuir bien tost, il ne faudra attendre la parfaicte suppuration, car le plus seur est l'ouurir, & pour ce on y appliquera le cautere actuel, ou potentiel, craignât que le venin ne se transporte & retourne au cœur, qui l'a chassé en ceste partie.

Plusieurs sont mesme d'auis de mettre le premier iour le cautere, couper l'escarre & mettre par-dessus ledit cataplasme, ou autre semblable.

Ou bien vne emplastre de diachilum magnum gommatum, avec vn peu de basilicum.

Quelques-vns apres auoir appliqué les ventouses font scarification & appliquent des sangsuës, afin d'attirer & decharger tousiours la partie de tel venin, & qu'il ne se communique au dedans.

Oribase dit que le second iour qu'il fut frappé de la peste, il se scarifia la iambe, & par les scarifications en tira deux liures de sang, ce qui fut cause de sa guarison, A telle exemple plusieurs appliquent des vesicatoires plus bas que la bosse ou

Oribase.

tumeur pestiferee. Autres y mettent vn cautere à fin d'attirer tousiours la venenosité & l'eslongner des parties nobles, luy donnant comme vn esgout.

La scabieuse cuite puis pilee avec gresse de porc est grandement recōmādee.

Autres louēt l'herbe nommee lisimachia, cuite & pilee avec gresse de porc, & mise sur la partie, estāt nommee pour ceste cause chasse- peste.

*Volaille
appli-
quée.*

Plusieurs appliquent sur la tumeur ou bosse vne volaille ou pigeons fendus en deux, aucuns plument la volaille par le cul, & l'appliquent dessus pour faire attraction: autres mettent des vesicatoires, comme vne coste d'elebore noir, ou l'herbe appelée ranunculus, qui sont bassinets des prez.

L'ouuerture faite s'il y a escare, on cōtinuera vne petite emplastre de basilicum pour la faire tomber, on appliquera vne tante dedans l'aposteme, & par dessus l'vn des remedes susdits: puis l'on mondifiera avec mondificatif de apio, auquel on aura adjousté pour once, vne dragme de mitridat, ou theriaque, sera incarnée & cicatrisee comme les autres apostemes, la tenant toutesfois le plus

long temps que faire se pourra ouuerte,
pour donner issuë au venin.

*Faut te-
nir la pe-
ste ouuer-
te.*

Cure du charbon pestiferé. Chap. II.

D'Autant que le charbon pestiferé
est ordinairement accompagné de
grandes & excessiues douleurs, il faut a-
uoir esgard de l'appaiser le plus que faire
se pourra, d'autant qu'il n'y a rien qui
abbate plus les forces & vertus que la
douleur, & ne dormir point: & pour ce
respect le Chirurgien aura esgard de
n'appliquer dessus ledit charbon, reme-
des si chauds & si attrahens comme à la
tumeur pestiferee, qui pourroient aug-
menter ladite douleur, mais se conten-
tera de doux suppuratifs, qui relasche-
ront & ouuriront les pores, en rarefiant
le cuir brulé, & par trop eschauffé, sans
toutesfois vser de remedes froids, ny re-
percussifs: donc en premier lieu on y ap-
pliquera ceux-cy qui suyuent.

*Au char-
bon faut
appaiser
la dou-
leur.*

La fomentation faicte d'une decoctio
de fueilles de mauue, guimauue, se-
mence de lin, fleurs de camomile, meli-
lot, est fort recommandee, y mettant de
l'huile de lis, & vn peu de theriaque: en
cette decoction seront trempés linges,
comme compresses ou estoupes qui

*Fomen-
tation.*

seront mises, & laissées sur le mal.

L'huile d'œuf pour les riches est fort bonne.

Cataplasme propre. On vsera aussi d'un tel cataplasme.

℞. foliorum malua, bismal. parietaria, senecionis & oxalidis. añ. m̄. j. hyoscyami & scabiose añ. m̄. j. β. passular. mundatarum ʒ. j. β. seminis lini & cidoniorum añ. ʒ. β. coquantur, pistent. pass. adde olei rosar. & lilio. añ. ʒ. j. β. butiri recentis ʒ. j. theriacæ veteris. ʒ. j. fiat cataplasma.

Propt. re mede. Sera bon faire un cataplasme d'oseille & de scabieuse, cuittes sous les cédres, y mettât du beurre frais & des jaunes d'œufs
On pourra mettre dessus des petits linges trempés en mussilages de semence de lin, de coings tirées en eau de paritoire & scabieuse.

Il se pratique un vnguent à la maison Dieu, tel que cestuy-cy.

Prenez farine de segle trois onces, miel commun vne once & demie, deux jaunes d'œufs, mezlez le tout ensemble avec eau commune, & en faites cataplasme.

Il faut scarifier le charbon. Si l'on voit que le charbon soit furieux, il le faudra scarifier assez profondement en plusieurs endroits, ou bien

le cauteriser, soit avec le cautere actuel, ou y appliquer le potentiel: aucuns mesme soudain que le charbon apparoist, font cōme à la peste, qui est d'y appliquer le cautere: car ladite cauterisation obtond sa virulence, rabat le venin, & appaise la douleur, puis on fera tomber l'escarre tant du charbō, que celle qui aura esté faite, & l'vlcere sera mundifiée & incarnée comme dessus.

Et ne faut obmettre où il y aura quantité de chair morte, à raison de l'escarre, la couper doucement, prenant garde de ne couper les tendons & vaisseaux.

Quelques ignorans apprentis sont si temeraires, de cerner ledit charbon, le coupant tout à l'entour, & emportēt la piece: ce qui est fort à craindre pour le flux de sang, mais on se contentera de le scarifier simplement.

*Ignorāce
d'aucuns
apprentis.*

Si le charbō venoit à cheminer, on aura recours aux remedes propres pour les gangrenes, comme ægyptiac, ou vitriol calciné, dissout en eau de vie, vsant par dessus de cataplasmes qui empêchent la pourriture.

Il y a plusieurs accidens qui suruiennent à ceux qui sont surpris de ceste maladie, comme flux de ventre, vomisse-

48 TRAICTÉ DE LA PESTE.
més, hemorrhoïdes, douleurs de teste,
costé, reins, courbature de membres,
lesquels pour brièveté n'auons traicté:
ioinct aussi qu'estans communs aux au-
tres maladies, on aura recours à icelles.

*Conclu
sion.*

Finissant par hūblesprieres quenous
faisons à Dieu, qu'il luy plaise appaiser
son ire, nous preseruer de ceste corrup-
tion de l'air, commandant à l'Ange, qui
est l'executeur de sa volonté, qu'il cesse
de frapper, de peur qu'il ne continuë sa
vengeâce, nous pardōnant nos pechez
qui sont cause de ceste maladie, à fin que
son sainct nom soit loué & inuoqué de
nous, & que sa miséricorde s'estende
dessus nous.

F I N .

2^e p. 1620.

Antoine Gancher

presen
meu

apartien

Antoine Gancher

de la Ville de Paris